

EPET JÕ KRĨ WÛR Pawrô Jõ Kàhhôc

Ûhỹ, pê Roman jõ krĩ kam, me hacjên xà kam Pawrô ihkrĩ, ne Jeju na mehkwy mã ajco hõ kàhhôc kujate. Na pê Epet jõ krĩ kam, Jeju namehkwy jakrã mehkrĩ atajê mã hõ kàhhôc ita kujate. Na pê hõ kàhhôc ita japry pê **Epet Jõ Krĩ Kam Jeju Na Mehkwy Jakrã Mehkrĩ Atajê WÛr, Pawrô Jõ Kàhhôc** (Epet).

Ne hõ kàhhôc ita kam ri cute Jeju kôt me ipa catêjê pê Jeju jĩa pyrác na, me cumã harên neto hahkre. Ne pom cu amjia kôt me amji jĩ jamãr to me papa, ita kôpit na mã, ihtyj Jeju me papê mehkwy pê hĩa pyrác ata jamãr to ipa. Nepom me pahkrã me pajĩ to ihhimpej to ipa ita na mã, Jeju me papê mehkwy to ihhimpej to ipa, pjê ita kam.

Pawrô te amji jarên xà

Me Hàpên Xà 18.19-21; 19.1-40

¹ Hàpà me ikwy pê Jeju na mehkwy, ipê Pawrô, ne ipê Jeju Crixto jarkwa na iprar catê. Ampo na? He Pahpãm pê ita caxuw icapi. Na wa Epetjõ krĩ kam, me apê Pahpãm na mehkwy atajê mã, apu ihhôt. Ne ca atyj Jeju Crixto to ate amji mã me ahimpej, ne ajpên kam me ahôncokam me to acrà ita na.

² Ne imã me pajõ Inxũ Cati pê Pahpãm me, me pajõ Pahhiti pê Jeju Crixto te me ato impejti na me ato prãm, mãr ca nee ame ampo kên cupa

nare, ne ihcãmtà rŭm me acaxwŷn me, me gĩ cunea cuhkrit pej pĕa mã me apa.

Pĕ Pahpãm ramã cute pjĕ ton xwŷjrea na amji mã me pahcapi

Roman 8.28-30; 1 Petrô 1.2

³ Cu ha Pahpãm pĕ me pajô Pahhiti pĕ Jeju Crixto Pãm pyrĕn me pajakryti na cumã me amji jarĕ. Ampo na? Cu cõjkwa kam me pajô Pahhiti pĕJeju Crixto kam me pahhõnco tu ita kam, ramã cute ampo pejtĩ cunea to me pahto impejti.

⁴ Pĕ pjĕ ton xwŷjrea na, ramã Pahpãm Jeju kam pahte me ajpĕn hõnco, ne me papĕ hõ tekjĕa xà caxuw, amji mã me pahcapi. Mãr cu kampahte amji kam me pajapac xà impej pit, ne Pahpãm kam mare mã me pahkam, ampo kĕn hamreare ne.

⁵ Ne Pahpãm mã me pahkĩn cwŷrjapĕ pĕ mam, rŷ pĕa mã, ramã ihcãmter pĕ Jeju Crixto kõt me pahto amji kra xà caxuw amji mã me pahcapi, ne ahna amji to. Ita na ri cumã me pahto prãam to prãm na pĕ to hane.

⁶ Pahpãm kĩnte, ampo caxuw me pampej nare cakrô, mã amjia kõt cumã me pahkĩn. Mã hàhcajrĕnti kam cumã ikra kĩnti ata kõt, me pahtoimpejti pyrĕn me pajakryti na, cu ha cumã me amji jarĕ.

⁷⁻⁸ Ne pĕ mam me papĕ ihhĕj rŭm pahte me Pahpãm to new catĕjĕ. Ne pahte me to kĕn xà ita kam ri, cute me hacjĕn xà kam me pajacjĕn, cu kam me pahkrĩ. PĕJeju pĕ me pahkritxwŷa, ne me pajaxà kam ty ne caprô jaxwŷ. Ne cute caprô jaxwŷr xà ata to pĕ me pahkĕn jahpan

xà na Pahpãm mã amgõ, mã cute me pahkên ita to tojnõ, cu pahtỳj ame papa. Hõ, pahte me Pahpãm to kên itajê cunea ri, cute to tojnõ, ne hìcu to hajÿr. He ampeaj kamPahpãm jàhcajrën cati, mã ihtỳj amjia kôt cama me pahto impejti to ipa, ihkrã kre te amji jahkre pejti kôt.

⁹ Ne pê mam nee jũm Pahpãm te amji kam hapac xà jahkre pej xà hamreare. Ne curmã ri Pahpãm te ihkra pê Jeju Crixto kôt me pamãamji to ipipẽ to prãm to ri, cute ihkujahêc.

¹⁰ Ne cute amji kam hapac xà pimxur jahkre kêatre ata te hajÿr he. Quê ha Pahpãm ihtỳj jũ caxuw cute amji mã amcro hyr xà ata na, cutepjê me cõjkwa kam ampo cunea ton itajê cunea to cuprõ, ne Jeju mã cugõ, mãr quê cupê hõ pahhi, ne to ihhimpej to ipa rohnÿtti mã.

¹¹ Ne hamre, Pahpãm te mam ramã amji kam hapac xà ton atajêa ton partu, cute amji mã ihkĩn xà ata na. Ne Jeju kam pahte me ajpẽn hõnco xà ita kam ri, cute amji mã me pahcapi, ne me pahto amji kwÿa. Nepê ramã ita to amji kam hapac hiahpuro, ne cumã ahna to prãm, na ri cute ton.

¹² He me ipê Juta catêjê, pê wa mam amji mã me iprĩa kam, Jeju Crixto pê me itehcajpar catê na me hikaj kam me tẽ. Cwÿrjapê waPahpãm mã me amji jarën to hane he:

— Me ijõ Inxũ Cati, he ampeaj kam ate me ito kênre nare, na ri me imã acati pê ihhêj rũm ampo jàhcujrohti ata pyrãac, ne ampeaj kam apej! — hane.

¹³ Ne pê hanea ne ite me amã Jeju pê me pahkên pê me pahpytår catê na harën to prãm

to, pê Pahpãm amji mã me icapi. Ne ite me amã harẽn xà ata, ampeaj kam ri. Na pê ca me ikampa, ne ite me amã harẽnxà to amji mã me ahimpej kam tẽ. Ne pê Pahpãm me pahcunea mã Carõ Pejti to awjahkreatã, pê me amã amji gõ. Ne cute me amã amji jõr xà ata, ihtỳj me apê hõ tekjê na me garẽ.

¹⁴ Ne pê Pahpãm Carõ Pejti ramã me papê hõ tekjê mã ampo jõr na amji ton hiahpuro ata, quẽ ha ihtỳj me pamã cugõ, ne ampeaj kam cu ha pahtỳj mepahkẽn pê me pahcato. Cwỳrjapê cu ha me pahcunea Pahpãm to me amnã ne cumã me hane he:

— Ampeaj kam acati! — hane.

Pawrô te me hũrên hakryti na, Pahpãm mã amji jarẽn xà

Roman 12.3-8; Epet 4.11-16; Coroxo 1.9-12

¹⁵⁻¹⁶ Ýhỹ, me ikwỳ, pê wa me ate me pajõ Pahhiti Jeju to amji mã me ahimpej na megarẽn pa. Ne hanea ne me amã me akwỳ cunea pê Pahpãm tekjê atajê kїн na me garẽn pa. Ne ite me garẽn par xà ata caxuw, wa nee meapyrên, ite cumã ijakryti na, amji jarẽn jicu nare. Ne wa ijõtpê Pahpãm mã me acajrẽn to ipa to hane he:

¹⁷ — Ýhỹ Pahpãm, apê me ijõ Pahhiti pê Jeju Crixto Pãm pê ijõ Inxũ Pejti ata, wa ha awỳ, ca ha Epet jõ krĩ kam me ikwỳ mã AcarõPejti te amji kam hapac xà pejti gõ, mår quẽ cute amji jahkre pejti, krã kreti kõt me hirõa pê, cute me gahkre pej na me to.

¹⁸ Ca ha hirãa pê me cumã ampo pejti incrẽ itajê to hahkre, mår quẽ me gahkre pej peytu ne.

Ne mam, ate amji mã me capi, mãr quê amjimã mehprĩa kam jũ caxuw cõjkwa kam acahê na amji to me ipijapar rohnýtti mã. Ne hanea ne me cupê atekjêa, na ca ha cõjkwa kam amã gâhcukrêj jãhtô catia ita kam, gõtpê amji mã me to impej to catia to apa.

19 — Ne hicu xà ita kam ca hanea ne acarôt týtji catihti to, me ite amji mã me ato ihmpej atajê tehcajpar to impeaj ne. Hõ, ampo to ate mecumã hahkre xà itajê to, ate me cumã hahkre xà ita na, wa ana ahwỳ — hane.

20 ÿhỹ me ikwỳ, he por Pahpãm carôt te me pahtehcajpar ata te ri hacpỹa mã Jeju Crixto to ihtĩr. Ne carôt ita to ri cute cõjkwa kamamji cahê na, awpõc rũm hỹr xà ata kam hỹr.

21 Ne cute to ampo cunea jõ Pahhiti, me paxũmre me, me pajõ pahhi catêjê me, me carõ cunea me, ampo carõ pej me, me pahcurê xwỳnti carõ kênme, me hõ pahhi catêjê me, cupê jarôti me, ampo cunea carôt týtji mea mã. Ne pom me hõ pahhi itajê cunea jirõa pê carôt tỳj ita na apuipa. Pjê ita me, cormã hapua na pjê ata kam, cupê pahhi ita na apu ipa rohnýtti mã.

Me papê Jeju na mehkwy pê hĩa pyràc

22 He ampeaj kam ri Pahpãm te ampo cunea jõ Pahhiti na, ihcãnter pê Jeju xãm. Ne hanea ne cute me pahkwỳ krã na hãm, mãr quê taa me pahto ihmpej.

23 Ne ihkrã kre te amji jahkre pejti ita kôt ri me papê hĩa, mã cupê me pahkrã. Na ri me pajĩ kam me pahcukrã xà cunea, ne nee ihnõ jamre nare.

Na cu ha pjê cunea kam cumã me pajapên to me papa.

2

Pê Pahpãm amjia kôt me pahkên pê me pahto cato

Roman 3.19-24; 5.6-11; Tito 2.11-3.7

¹ Ýhỹ me ikwỳ, pê ca mam me acunea ajco me akên ton to me apa, ne ajco Pahpãm jarkwa jirô pê me apýpým to me apa, cwýrjapê ri cumã me apê mehtyc pyràac.

² Ne caku atajê kam pê ca pjê kam, cute amji kam me hapac xà atajê to pit mã me amji pyrác. Ne ate Xatanaj pé me pahcurê xwýn carô kênatajê jô pahhi te, Pahpãm jarkwa jirô pê mehþýpým xi atajê to, pê ca ajco amji mã me ahimpej to me apa.

³ Ne pê mam me pahcunea pê me hũràac, ne ajco amjia kôt pahte amji kam me pajapac xà kên atajêa kôt, me papa. Ne me pajĩ me, me pahkrã te amjimã ampo na ihþrãmti atajê pit ton to me papa. Ne ihkôt me papa xà ita kam, cu me papê mehkên catêjê atajê pyràac, ne ma ramã me cuxà Pahpãm te pahte me amji pupun xà kêanre na me pahton xà ata wýr me pra.

⁴⁻⁵ Ne me pajũpar nare ita kam, ihhêj rũm ramã Pahpãm mã me pahtyc par. Ne Pahpãm mã me pahkĩn catia, ne ampeaj kam cumã me pahcaprĩ. Cwýrjapê ri cute Crixto kôt ihhêj ne hacþýa mã me pahto ihtĩr. Xà mœrmœ ajkĩ me pampej cwýrjapê mã, cute me pahkên catia pê me pahtocator? Hãpà! He hàhcajrëan to

hàhcjårn na ri amjia kôt, cute me pahkên catia ita pê me pahto cator, ne me pahto impej.

⁶ Pahpãm te Jeju Crixto kam me pahhônco na me pahton. Cwÿrjapê ri ihhêj rûm hacpÿa mã ramã cute me pahto ihtîr, ne ma cõjkwa wÿrme pahto hàpir, ne Jeju cahê na me pajÿr, ne cahê na cute ampo cunea to me pahhimpej na me pahton.

⁷ Ne mÿr ampo na mã cute me pahto hajÿr? He nee mã ampo na nare! He pjê cunea kam ame ipa itajê, quê ha ita caxuw Pahpãm me cumã hàhcjårnti, ne ma me pahcaprî na me hahkre pej. Ne cute me pamã Jeju kôt me pahto impejna, me hahkre pej na cumã me pahto prãm, rohnÿtti mã.

⁸ Xà cu Pahpãm mã ampo pej pit ton to ame papa na mã, cute me pahkên catia pê me pahto cator? Hãpà! He Pahpãm te amjia kôt, mepahtehcajpar prãmte, me pamã ihkra pê Jeju jõr, mår cu to amji mã me pahhimpej, quê ha amjia kôt cama me pahpytà.

⁹ Ita cwÿrjapê quê ha nee jÿ caxuw jÿm amji to hàmnãn to:

— Ite amji kam ijapac xà impejti, ne ijapên xà impejti ita jahpan xà na ri, Pahpãm te ikên pê ito cator — hajÿr nare. Jÿ wÿr quê ha jÿcaxuw jÿm amji pej na amji to hàmnãn to hane.

¹⁰ Ne mÿr ampo cwÿrjapê mã pê Pahpãm me pamã pahte amji kam me pajapac xà tuw pejti ita gõ, ne pjê kam me pahto ajpa? Nee mã ampocwÿrjapê nare. He ramã Pahpãm te Jeju Crixto kam me pahhônco na me pahton, pahte jÿmjê to me pajapên to impejti to prãmte to me papa xàcaxuw. Por rÿ pêa mã cute me pamã

hàpên xà pejti to me pajàpên na, me pahto amji kam hapac ata to, cu ha me apê. Cwÿrjapê cu ha pahtÿjajpên to impejti to me prãm.

Juta catêjê me, mehcahkrit atajê me ajpên hônco xà

Carati 3.28; Coroxo 1.21-23; 1 Petrô 2.4-8

¹¹ Wa me ipê Juta catêjê hãn ne me ajhu, ne itÿj amji mã me ipÿ kà kryjre ne me hakep. Ne hakep xà ata pê ri Pahpãm tekjê na cute meijarên xà. Ne me apê mehcahkrit pê Juta catêjênare atajê na, ca amji to me amjijapackre. Ne pê wa mam ajco me ato amji kam ijapac to:

— Itajê mã mehkà jakep nare, na ri nee me cupê Pahpãm tekjê nare — hane.

¹² Ata caxuw pê ca caku atajê kam Jeju Crixto pê ampÿa mã ame apa. Ne pê Pahpãm rÿ jÿ caxuw me amã ampo to hÿjahkre nare na mã, ca neerÿ me icuxà Pahpãm me, me ajpên kam gapac nare. Na pê me apê Pahpãm tekjê nare, ne me apê Pahpãm jahkre kêatre ita kam, ca nee amjiwÿr ihpîn ampo pejti cator xà ata jikaj nare.

¹³ Ne ita caxuw quêt nee hipêr ate me hajÿr nare, ne Pahpãm pê ampÿa mã ameapa xà nare. Ampo na? Nee mã ampo na nare. Pê Jeju Crixto me gaxà kam ty ne caprô ajxwÿ, ne ihtyc xà ata kôt, ca ate kam me ajpên hônco. Cwÿrjapêri Pahpãm te amji wÿr me ato hàhtêp.

Quê ha Pahpãm me cupê Juta catêjê me, mehcahkrit na amji capa

¹⁴⁻¹⁶ Mã Jeju te mehcuran catêjê mã amji jôr, mã cute mehcuran, mã me pajaxà kam ihtyc. Ne ihtyc xà ata te ihcunea na ajpên na mepajaxôr to

hajÿr he. Cu ha nee hipêr ajpên kam me pancryc nare, ne quêt catyt kam ajpên mã me pahcakôc to me papa. Quê ha hanea ne, neehipêr me iquêtjê pê Mojxe xwÿ caca xà ata, me pahto ihhimpej nare. Ne nee hipêr me acahkrit nare, ne nee hipêr me papijakrut nare, ne quêtajpên kam me papê Pahpãm na mehkwyÿ pyxit peaj, ne ajpên kam me pantuwti, ne me pahpyxit peaj. Ne hacpÿa ne Pahpãm wÿr me pahcunea te amji jaxàr.

¹⁷ Ne cute me apê mehcahkrit atajê, ca ampÿa mã Pahpãm pê ame apa atajê me, me ipê Juta catêjê, pê wa hÿ na pire mã ame ipa atajê to hacpÿa ne Pahpãm wÿr me amji jaxàr. He pê neejÿm ajpên na me pajaxôr na harên nare. Pê Jejuaajpên na me pajaxô.

¹⁸ Ne pom Jeju te me papijakrut mã ampo ton itajêa kôt, cu ha pahtÿj Pahpãm Carô Pejti pyxit peaj ata kôt, ihwÿr me axà, ne cumã me pahcakôc.

¹⁹ Cwÿrjapê ri ita caxuw, nee hipêr me pahnô te amji to ihcahkrit xà hamreare. Ne quêt me icuxà me apê Pahpãm kraa to kra, ne me apêmehkwÿa, ne ajpên kam me papê mehkwyÿ ita na, ne me pahpyxit peaj.

Me papê Pahpãm na mehkwyÿ pê hÿrkwa pyràac

²⁰⁻²¹ Por mam Krÿpinkrên kam, Pahpãm to amji kam hapac xà jÿrkwa ata kam pê Pahpãm ihkrÿ. Ne cute me Pahpãm jahkre pej prãmte, pê ajco makên me pÿ te ikre ata wÿr me pra. Ita kôpit na mã, me papê mehkwyÿa pê Pahpãm jÿrkwa

pyràac. Ne ita caxuw me pahkam Pahpãm ihkrĩ, ne mepahkôat ri me cumã Pahpãm jahkre pej. Ne me papê Pahpãm jũrkwa mã hikwa xà me, hiwrÿhhi me, pô me hõrti pyràac. Ne pê mam Jeju jarkwa na memprar catêjê me, Pahpãm jarkwa to me cumã mehcahôc catêjê atajêpê ihhêj rũm, harã na ikre mã hũxwÿr xà me, cumã hũxwÿr xà cati pyràac. Ne Jeju Crixto pê ri ikre mã hãm xà catia ata pyràac, mãtahna ihhê cunea te cuprõn tu. Ata jĩkjê na mã me papê Pahpãm jũrkwa, mã me pahkam ihkrĩ.

²² Ne ate me hajÿar ne atÿj Jeju to ate amji mã me ahimpej xà atajêa kôt ri ihhêj rũm me apê Pahpãm jũrkwa, na ri Pahpãm ihtÿj Carõ Pejti ata kôt me akam ihkrĩ.

3

Me cupê mehcahkrit mã ri Pawrô pê Pahpãm jarkwa na imprar catê

Roman 15.14-21; Coroxo 1.24-29

¹ Ata kôt wa itÿj Pahpãm mã me acajrën to ipa. Ÿhÿ, ipê Pawrô, ne pa wa me hacjên xà kam ikrĩ. Ampo na? Wa Jeju Crixto jarkwa kôt meapê mehcahkrit atajê mã Jeju pê me pahkritxwÿ jarën xà impejti itajê to harë, ne me amã to hahkre.

²⁻³ Ne pê Pahpãm hàhcaprĩa kam icapi, ne ijĩa to me acaxuw ihhimpej to hane he:

— Mõ, ne mehcahkrit catêjê mã ijarë. Ne nee mã ampona, ca ha me cumã ijarën nare. He wa hacpÿa mã cute me ajpën hõnco, ne ajpën mã me caprĩ na ri, imã me to prãm. Cwÿrjapê pê wa pjê ita wÿrme cumã ikra pê Jeju ata kujate.

Ata ca ha me cumã harẽ — hane. Ne pê ca ramã ita na meijarẽn pa. Na wa ite curmã ihkàhhôc ita kam hipêr ahna me amã amji jarẽn, ne ahna me amã ihhôc, mâr ca me cahyt ne ahna me ijahkre pej.

⁴⁻⁵ Pê mam nee jũm Jeju Crixto na Pahpãm te amji kam hapac xà ata jahkre pej nare. Ne ita caxuw Pahpãm Carõ Pejti te Pahpãm jarkwa to mehcahôc catêjê me, me ipê Jeju jarkwa na memprar catêjê mã toajpê, ne me imã to hahkre.

⁶ Ýhỹ, ita caxuw ca ha Jeju tycxà ata kôt, me icuxà me apê me pajõ Pahhiti pê Jeju Crixto jĩ pyrãac. Ne me ca, me apê mehcahkrit atajê me, me pa, me ipê Juta catêjê me, ajpẽn kam me pahpyxit peaj. Ne por pê Pahpãm ramã mehkwy mã ampo pej cunea to awjahkre atajê, ca ha atỹj hanea ne me cuxà me acwa.

⁷ Pê Pahpãm carôt tỹjti ata hàhcaprĩa kam, me amã ipê harkwa na iprar catê na ixãm ne ikujate, mâr wa me amã harẽn xà impejti to harê.

⁸⁻⁹ Ne wa pa, me cupê Pahpãm tekjê atajê japyre mã icrire na amji to hajỹr cakrô, pê Pahpãm ihtỹj imã ijapên xà impejti ita gõ. Ite meapê mehcahkrit atajê mã Jeju Crixto te amji kam hapac xà tuw pejti jarẽn xà kôt harẽn to capô partu xà caxuw, pê imã ijapên xaita gõ. Por Jeju te amji kam hapac xà impejti jakràjti ata, wa me amã harẽn to ipa. Mâr ca me acunea Pahpãm te mam pjê ton xwỹjrea na, me amã amji kam hapac xà to ipipê nare ata jahkre pej. Ne Pahpãm ita pê, por pê Pahpãm ampo cunea to ata.

¹⁰ Ne ita caxuw cumã, mehcunea te Pahpãm te amji kam hapac xà jahkre pej na, me to prãm. Ne

quê ha, por ampo carõ carõt tỳjti atajê me, pjê me cõjkwakam me hõ pahhi catêjê atajê cunea, quê ha me papê Pahpãm na mehkwỹ pupun xà ata kõt, me Pahpãm te ihcunea na amji jahkre pej catia na me hahkre pej.

¹¹ Pê mam, pjê ton xwỳjrea na, Pahpãm ramã Jeju Crixto pê me pajõPahhiti te me pahto impej na to amji kampa.

¹² Cu pahtỳj Jeju to amji mã me pahhimpej, ne ahna me ajpẽn hõnco. Cwỳrjapê cu ha nee Pahpãm mã me pahcakõc na me pajàhtat nare kam, cumã me pahcakõc. Ne cu ha pahtỳj cute me pahkam hapac na me hahkre pej.

¹³ Ỡhỹ, he me acwỳrjapêa wa me hacjên xà ita kam amji pupun cakrõ, ca ha nee ate me ipupun xà ata kõt me amã amji kїн nare nare. Ne quêt ite me ato impejti xà caxuw ri, ite amji pupun kêanre xà ita.

Pawrõ te Pahpãm mã mehcajrẽn xà

¹⁴ Ampo itajê cunea cwỳrjapê wa me pajõ Inxũ Cati cuna mã ikõn krã na ijỳr, ne ijõtpê cumã me acajrẽn.

¹⁵ Ampeaj kam Pahpãm pê me pajõ Inxũ Cati. Ne cupê pjê cunea me, cõjkwã kam ampo kra me, ikre ry cunea me, por amji mã me to ihmipej atajê cunea Pãm Cati.

¹⁶⁻¹⁷ Wa hõtpê cumã me acajrẽn to hane he:

— Me ijõ Inxũ Cati, ampeaj kam acarõt tỳaj to ihtỳj, ne gàhcajrẽn cati. Na ca ha Acarõ Pejti kõt, cute me amji kam hapac xà caxwãm pê mecumã acarõt tỳjti ata gõ, por ate amji kam gapac xà pejti carõt tỳjti ata kõt. Mãr quê kypê Jeju

Crixtô to amji mã mehhimpej nare. Ne ajpênkam mehhônco ata pê ihhêj rûm me caxwãm pê cute apu ihkrĩ. Ne pom ampo pàr pjê impejti kam harê to ihcuhê, ne ihtÿj ipicamên to ipa, ita kôpit na, ca ha me cumã mehcunea mã ajpên kĩnti ita to apicamên to mõi. Ne ampeaj kam akra Jeju mã me ikĩn catia, ne nee cumã jũm kĩn nare nare.

18 — Ne akra pê Jeju mã me ikĩn ita pê ihhêj rûm kēnti kàa nõi ata pyràac, ne cupê ihhêj rûm cõxwa tua pyràac ne catia, ne ihhêj rûm cupê põi pyràac, ne nee hìcu xà hamreare. Ne ampo pejti catihti itajê jĩkjê na mã, akra mã me ikĩn te hajÿr. Na ca ha me caxwãm pê mecumã to hahkre, mãr quê mehcunea mã akra mã mehkĩnti ita te, amji kam hapac xà itajê jahkre pej pa.

19 — Jũ wÿr quê me ixũmre nõi akra Jeju mã me ikĩnti xà catia to cati ata na hahkre pej, cwÿrjapê ca ha cute Jeju Crixtô mã ikĩnti itajahkre pej na me akwÿ tehcajpa, quê me kam hapac kam tē, ne me hahkre pej. Mãr ca me cumã amji gõi, quê me cupê apyràac to mõi, ne mempejti ne.

20 — Ỹhÿ me ijõ Inxũ Cati, me ikam acarõt tÿjti ita kam, ca atÿj me imã, pom ite ampo na me awÿr, ne me to amji kam ijapac xà atajê jirõa pēate me imã hõr na, imã me gahkre pej.

21 Ne me imã me icunea pê Jeju Crixtô na mehkwy, ne wa ahna me ajpên hõnco. Ne wa acatihti me acarõt tÿjti me, gahcajrēnti na apyrēn me ijakryti na, me amã amji jarēn to prãm, rohnÿtti mã. Netahnaa, hamre — hane. Hõ, wa ita na ijõtpê Pahpãm mã me acajrēn.

4

Me papê mehkwy pyxit peaj, na cu ha ajpën to mempej

Pirip 2.1-4; Coroxo 3.12-17

¹ Yhÿ me ikwÿ, pê Pahpãm me ato impej ne amji mã me acapi, mãr ca cute amji kam hapac xàa kôt me apa. Ne ita cwÿrjapê wa me awÿ, hePahpãm jàpën xà incwÿrjapê wa ipê me hacjên xà kam ikrĩ catê. Ne pa wa me awÿ, mãr ca me apê Pahpãm tekjê atajê, cute amji kamhapac xàa to amji kam me gapac to me apa.

² Ne nee me hirôa pê amji to me acati to me apa prãm nare. Ne ampo na amji mã aprĩa kam, gũcanâr to me apa. Ne amji mã me akwÿ cupa. Ne neeampo na ame amji to ihtÿj tu to me apa nare. Quê jũm ampo to kên, ca ha nee kam me acryc nare. Ne quêt me amã ihkĩan kam, me gakryti kam cumã me gũcanâr to me apa.

³ Pahpãm Carõ Pejti te me acunea mã ajpën kĩnti ton, ne ajpën kam me apejti na me aton. Cwÿrjapê ca ha ajpën mã me awcanã, mãr ca atÿjajpën kam me ahônco to me apa kam me to acrà.

⁴ Xà ajkĩ Pahpãm Carõ Pejti te amji kam hapac xà jàhtô? Hãpà! He Pahpãm Carõ Pejti pyxit peaj. Cwÿrjapê ri ajpën kam me pahcuneapyxit peaj. Ne ihhêj rũm me papê Jeju jĩ pyxit peaj ata pyrãac. Ne hanea ne pjê ita kam Pahpãm te me pahcunea to ihhimpej xà pyxit peaj atamã, cu ramã me hikaj xà caxuw ri Pahpãm te me pahcapi.

⁵ Ne hanea ne me pamã me pajõ Pahhiti pyxit peaj. Ne pahte Jeju to amji mã me pahhimpej xà ata pyxit peaj. He ampo pyxit peaj ita caxuw ri cõ to me pahcumrâr xà.

⁶ Ne hanea ne Pahpãm pê, por pjê cunea kam amji mã me to ihhimpej atajê cunea jõ Inxũ Cati pyxit peaj, ne mehcunea to ihhimpej. Mã ihtyj hãpên xà atajê kam ihkôat me apê, ne me Pahpãm ita ri me pahcunea kam ihkrĩ, cwýrjapê cu ha pahte amji kam me pajapac xà pyxit peaj to, amji kam me pajapac to me papa kam me to pancrà.

Pê Pahpãm ahpÿanre na me pamã pahte to amji japackre xà gõ

Roman 12.3-8; 1 Petrô 4.10-11

⁷⁻⁸ Xà Pahpãm te me pahcunea mã pahte me hahkre pej xà pyxit peaj jõr? Hãpà! He cumã me pajapên xà caxuw ri, cute ahpÿanre na mepamã pahte amji kam me pajapac xà te to amji japackre xà jõr, Jeju Crixto te amji mã ahna prãm ata na. Ne pê Pahpãm jõ kàhhôc kam, ramã rÿ pêa mã jũm Jeju na ihhõc to:

“Quê ha me curê xwÿn jãhtõa ne tohjê,
ne ma hacpÿ mã cõjkwa wÿr api.

Ne pjê kam mehkwy ame ipa atajê mã cute ampo
jõr xà atajê gõ” hane.

⁹ Hũjarên xà ita kôt, cu ha pahtÿj cõjkwa wÿr Jeju jãpir na me hahkre pej ne me to amji japackre. He pê nee Jeju põ rũm, pjê ita wÿr pít

mã iwryc nare, ne hanea ne pjê krac ri mehtyc carõ krĩ xà ata wỳr wrỳ.

¹⁰ Ne taa hanea ne hacpỹa mã cõjkwa wỳr api ne hakren tu, cute ampo cunea to ihhimpej xà caxuw.

¹¹ Ne Jejua te ri ahpỹanre na, me pamã pahte amji kam me pajapac xà te amji jahkre pej jõrpar. Ne cute me pahkwỳ capi, mār quê me cupê harkwa na memprar catêjê, ne mehkwy pê harkwa to me cumã ihcakõc catêjê, ne mehkwy pê Pahpãm te me pahkên pê me pahpytâr xà ata wỳr me to ipipkjêrcatêjê, ne mehkwy pê Jeju na mehkwyà jamār catêjê, ne mehkwy pê mehkwyà mã ampo to hahkre catêjê. Ne Pahpãm te mehkwy atajê mã ahpỹanre nacute me amji kam hapac xà te amji jahkre pej atajê jõr, me hâpên xà itajê caxuw.

Cu ha pahte amji kam me pajapac xà to me amji jĩ tỳj to me mõi

¹² Ne mër ampo caxuw mã cute me pamã mehkwy itajê jõr? He nee mã ampo caxuw nare. He Pahpãm mã me pajâpên xà ata pê ihwỳr me to mepapipkjêr xà caxuw ri, cute me pamã mehkwy itajê jõr. Ne me pajâpên xà ita kõt rime papê mehkwy, cu pahtỳj me papicamên to me mõi. Ne me pamõr xà ita pê ihhêj rûm Jeju Crixto jĩ picamên to mõi pyrâac.

¹³ Ne cu ha me pahcunea me papicamên to me pamõr ita kam me to pancrà, ne JejuCrixto to pit mã amji mã me pahhimpej to ajpên kam me pahhõnco tỳaj to me papa. Mār cu Jeju cuxà,

pahte amji kam me pajapac xà itajêa to me amji kà to me amji jĩ tỳj to me mō.

¹⁴ Ne cu ha nee hipêr me papê ahkrare pyràc, ne jũm te me pamã ihhêj xi xà ata kôt, Jeju to amji pê me pajapac kêt to me pamõr nare. Nãmri quê ha me pahnõ te hajỹr na, quê ha cupê ihhêj rũm kôc te amji wỳr pjê kam pĩhhô incrà to imprar ata pyràac, na quê ha ihtỳj mehhêj xi catêjê te aracri mehkên mã me irên prãm atajê kampa, ne ihtỳj jũ ri me ipa xà ata kam ihkôt me ipa.

¹⁵ Ne Pahpãm mã cute me hajỹr catêjê kôt, me pahto prãm nare. Ne quêt cumã me pamã ajpên kĩnti kam me pahcakôc xà kam, me pahhêj xinare na, cumã me pahto prãm. Cu ha pahte me hajỹr to me pamõr na, cu ha me papê me pahkrã pê Crixto ata pyràac ne me ajpêan.

¹⁶ Ne Crixto pê me pahkrã, cu ha kam me pahhônco, cwỳrjapê quê me papê hĩa pyràc. Ne ahpỹanre na me papê hĩ kam cukrã xà atajêpyràac, mã taa pyxit peaj me pahcunea to ihhimpej. Ita kôpit na cu ha me pahcunea Crixto te amji kam hapac xàa kôt me ajpên kĩnti, kam meajpên tehcajpar to me papa. He pahte me pahkwỳ to me hajỹr to me papa xà ata pê Jeju Crixto jĩ te ipicamẽn to mõr pyràac.

Cu ha quêt me pahte amji kam me pajapac xà tuw pejtĩ ita kôt me papa

Coroxo 3.5-11

¹⁷⁻¹⁸ Cwỳrjapê wa ha Pahhiti jarkwa na me amã awjarê, ca ha atỳj catyt kam me ikampa. Por nee Pahpãm to amji mã mehhimpej nare

atajê teamji kam hapac xà atajê wa ha me amã ihcawpa, mār ca nee hipêr cute me amji kam hapac xà kên atajê kôt me apa nare. He cute amji kam mehapac xà itajê kôt hamreare. Ne ihhêj rûm me cupê awcapàtkôti kam ame ipa, ne nee me ampo pupun nare atajê pyràac. Ne nee me caxwãm pê me Pahpãm pupun ne me hahkre pej nare. Ne cute me hajÿr xà ita kam ri ma ame Pahpãm te amji kam hapac xà tuw pejti ita caca, ne cute mempar cupate me hapac jihê, na ri me cupê hahkre kêatre.

¹⁹ Ne nee ajte amji jũ na mehpahàm nare, mã mãnea mã mehkrã kên kam, cute mehkên ton xà itajê kam me amji cajpêr nare na me to. Mã mehcunea ampo kên xen xà pahàm nare atajê mã, me amji jôr to me ipa, ne ihtÿj me ton to me ipa kam me to incrà tu.

²⁰⁻²¹ He nee Jeju Crixto te amji kam hapac xà te hajÿr nare. Ne pê ramã jũm me amã Jeju te amji kam hapac xà to hahkre, ne me amã harê. Na ca ramã ate mempar ne me hahkre pej, ne kam me amji hônco, cwÿrjapêca ate amji mã me cute amji kam hapac xà incwÿr.

²² Ne mam me amã ampo kên ton to me ipa xà ata pit na me amã prãm. Cwÿrjapê ri ate amji kam me gapac xà tũm kêanre ata ihtÿj me amãihhêj, na ca hãn ne atÿj ihkôat me akên mã me acjêj. Cwÿrjapê ca ha mam ate amji kam me gapac xà tũm ata mã me hikra, ne neehipêr me ahna prãm, ne me to amji japackre nare.

²³ Na ca ha me ate amji kam me gapac xà wej ita me, intuw to me ahpa, ne ate amji kam me gapac xà intuw ata, ca ha amji mã me huwahi to

me apa.

²⁴ Ne pom cu hãn ne me pahkà tũm to pøj, ne intuw mã me amji jacjê, ne mehtũm jicu ne me curê, jĩkjê na, ca ha ate amji kam megapac xà kên tũm ita to me tojnõ, ne me hıcu, ne intuw ita ca ha amji mã me acwa, ne me huwahi, ne me to apa. Ne Pahpãm ri me amã cute amjikam hapac xà pejti jõr to ipa. Mãr ca me apê me hũràac, ne me ate amjikam me gapac xà impejti ne, ne nee ihhêj xi nare, ne ampo cunea kam catytkam, Pahpãm cuna mã me apejti na me apa.

Cu ha me ajpẽn to me pampej to me papa

²⁵ Cwỳrjapê ca ha nee hipêr ajpẽn mã amji to ame ahêj nare. Ne ahpÿanre na quêt catyt kam ajpẽn mã me acakõc to me apa. Ampo na? Heme papê Jeju jĩ kam cukrã xà atajê pyràac, na ri ajpẽn kam me pahpyxit peaj.

²⁶⁻²⁷ Ne ca ha me anõ te ame akwỳ nõ kam acryc na, ca ha nee kam acryc kam acrà nare, ne pyt xàr xwỳjrea na, hacpÿa mã ajpẽn mã meacaprĩ. Nãmri ca ha ate nee kam acryc jicu nare, ne mãnea mã kam acryc na, quê ha apê me pahcurê xwỳnti pê Xatanaj te amji kam hapac xà kõtapa catê, na ca ha atỳj Pahpãm to kên to apa.

²⁸ Na ca ha mam ajco me gàhkĩj to me apa atajê, ca ha me gàhkĩj jicu, ne me gápên kam me atêm pyrentu, mãr ca me akrã kreti te amji jahkre pejti kam, me amji to ajpa, ne me akwỳ pê hamreare atajê tehcajpa.

²⁹ Ne nee ame acakõc xà kên kam amji kїн nare atajê to me acakõc to me apa nare. Ne me acakõc xà impejti kam amji kїnti to ca me akwỳmã

me acakôc, ne ma me to impej to me apa. Ne cute me Pahpãm kam hapac na mehtehcajpar xà atajê to, ca me acakôc to me apa, mâr quê me akampaatajê, ma me ipicamên to me mō.

³⁰ Nãmri ca ha ate me hajÿr nare na, ca ha cama Pahpãm Carõ Pejti mã amji kîn nare, ne ihpeacre na me to. Ne me akam Pahpãm Carõ Pejti te ihkrî xà ita pê ihhêj rûm, cute me akam amji japrÿ na ihhóc. Cuteme apê hō tekjê na me ato apipê xà caxuw. Ne ihkôat ca ha atÿj jÿ caxuw cute me akên pê me apytâr na me amji jahkre pej.

Cu ha ajpên mã me pahcaprî to me papa

³¹ Ne ampo kên itajê ca ha me hîcu he. Ca ha jÿm me ajpên kam acryc ne ma ame ajpên mã acaprî caca ata, ca ha amji pê ihcaca ne hîcu, neatÿj hacpÿa mã ajpên mã me acaprî. Ne me gâhcurê me, me gâprê jîcu, ne quêt me amã ajpên kînti, ca me ajpên caprî to me apa. Nenee ajpên mã me gâkjêr nare. Ne nee ame hÿn kên to me apa nare. Ne nee ame ajpên curê to me apa nare.

³² Ne quêt cama ajpên mã me acaprî, ne ajpên mã me apejti ne. Ne Crixto kam mē ahônco, ita cwÿrjapê ri Pahpãm te ramã ate me to kên xà atajê to tojnō ne me hîcu. Na ca ha cuxà ate me ajpên to kên atajê to tojnō ne me hîcu.

5

Cu ha ampo kên cunea jîcu ne quêt catyt kam me papa

Coroxo 3.16-17; 1 Jowãw 1.5-10

¹ Me apê Pahpãm kra, ne cumã me akĩnti, cwÿrjapê quê ha me apêhũràac na amji kôt me ato prãm.

² Crixto mã me akĩnti na ri, me acwÿrjapê ihtyc xà mã cute amji jôr. Mã Pahpãm te cumã me akĩnti ita na hõmpun, ne ampeaj kam haneane ahna Pahpãm mã Jeju kĩn. Ne cumã Jeju tyc xà ita pê ihhêj rûm ampo cacô cuxwati impejti te ihcajpuaw ata pyràac. Na ca ha Jeju cuxame amã ajpẽn kĩnti to amji mã me ahimpej to me apa.

³ Ne ramã me apê Pahpãm na mehwÿ, cwÿrjapê ri nee me ate ampo kên crê itajê caxun xà nare he. Mam ca ha nee ahti na ame cupê mehprõcaxun nare, quê nee pyjê xwÿjê ahti na ame cupê mempjê caxun nare. Ne hanea ne nee menxyre impijapit to ame apahàm nõ to me apa nare. Ne ihcote na, ca ha hanea ne nee gâhcukrêj to pit mã amji mã cuprõn to me apa to me amjijapackre nare. Ampo na? He jũm te hajÿr to ipa xà ata, nee Pahpãm to amji japackre nare, ne hàhcukrêj itajê pê ri ihhêj rûm me hõpahpãm, ne ampeaj kam cumã ihkĩn, mã to pit mã amji kam hapac to me ipa. Ca ha nee me anõ te ampo kên itajê nõ caxun to kênre xàhamreare ita kam, jũ wÿr quê jũm ahna me anõ jarê.

⁴ Ne hicu xà kam, ca ha nee ame acakôc xà kam, me pahpahàmti atajê to me acakôc to me apa nare. Ne nee me acakôc xà kôt hamreare atajê to me acakôc tome apa nare. Ne nee ca ha me garkwa xÿ xà tũmti kêanre atajê to me acakôc nare. Ne quêt Pahpãm te me amã ampo

pejti cunea jōr itajêpyrên me gakryti na, cumã me amji jarẽ.

⁵ Xà quẽ ha pijamã cute ampo kên crê itajê ton to me ipa catêjê nõ, Pahpãm me Crixto himpej xà krac ri me axà? Hãpà! He jũm xàr xà hamreare na ramã me pamã hahkre pej. Ampo na? He Pahpãmã me cupê ihhêj rũm pahpãm cahac krekà to amji mã mehhimpej catêjê pyrãac, ne mehkêanre.

⁶ Nãmri quẽ ha jũm te awỳr ihtẽm, ne pom wa ite ampo kên tẽte me amãn atajê nõ to amã ihhêj prãmte, hỹrmã gator na, ca nee me harkwakõt hamreare atajê kam gapac, ne ihkõt amji ton nare. He ampo kên itajê cwỳrjapêa ri Pahpãm me kam incryc. Ne quẽ ha ihtỳj jũ caxuw, por jũmjê te nee me kam hapac nare atajê kam incryc, ne ame to kêanrene, ne ihtỳj mehkên mã me curẽ.

⁷ Cwỳrjapê ca ha nee cute me hajỳrjê to me amji japackre, ne me to amji kwỳ nare.

Cu ha pahte amji kam me pajapac xà tuw kõt me ampo cunea jahkre pej

⁸ Ýhỹ, he pê ca mam ihhêj rũm me apê mehtyc pyrãac, ne me akam awcapàtkô pit. Mã pyt ahcujro, cu pahtỳj me rĩt ne me ampo pupu, itajĩkjê na mã Pahhiti jarkwa ihtỳj me amã ampo pej to pit mã hahkre to mõi. Ne ate Pahpãm na mehkwỹ na me amji ton xà ata caxuaw, ca ha atỳj ita caxuw ampo pej cunea pupu. Cwỳrjapê ca ha ate ampo pej pupun xà atajêa kõt me amji ton to me apa, ne me to.

9 Ỹhỹ, ca ha ate me Pahpãm jarkwa pê hàhcujro xà pyràc ata kam me hajỹr to me apa na, ca ha me apê jũmjê pejti atajê, ne catyt kam ameapa, ne me acakôc xà hêj xi nare pê catyt kam, ampeaj kam atajê to pit mã, me acakôc to me apa.

10 Ne ca ha ate me hajỹr to me apa na amji to me gâhcukjêr to me apa na, ca ha me Pahpãm cajpuaw.

11 Ne por cute amji kam me hapac xà kêanre kam, Pahpãm jarkwa pê hàhcujro xà pyrâcti ata kaj na, awcapàtkô kam me ipa atajê jâpên xà cunea kôt hamreare. Cwýrjapê ca ha nee mehkôt me apa na amji toprãm nare. Ne quêt mehcunea kam mare mã, ca ha ate amji kam me gapac xà pejti jâhcujrohti to me apa. Mâr quê ahna me apupu, ne cute me apupun xà ita kôat me amji kên itajê pupu, ne ahna me amji jahkre pej.

12 Ỹhỹ, ampeaj kam ri cute amji kam me hapac xà atajê kêanre, cwýrjapê cu ha nee cute me ampo kên to ipimxur, ne aracri ame ton atajê na, nee me pahcakôc xà nare. Ampo na? He kypê ahna me kam me pahpahàm nare.

13 Quê ha hàhcujro xà to ampo kujro, quê ha hirã pê hõmpun xà. Ne por hàhcujro xà te ampo jakati pràti kujro ata, ihtýj ma harwry itakôt ahcujro. Ita kôpit na quê ha mehkrã kên catêjê atajê, ate amji kam me gapac xà imejti na me apupu, ne me akôat quê ha ramã cute meamji kam hapac xà kêanre na me amji jahkre pej. Ne me akôat quê hahanea ne cute amji kam me hapac xà imejti to me ipa.

¹⁴ Ne pê Pahpãm ramã me pamã ita to ihcakôc to hane he:

“Por ate amji kam me gapac xà kêanre ata kôt, ihhêj rûm ramã me atyc atajê, me ampra!
Ne me atyc ita pê me to xa, quê ha Crixto me amãate amji kam me gapac xà cujro,
ne hacpÿa mã me ato tîr!” hane.

Cu ha me pahkrã kreti kam me amji to ajpa

¹⁵ Cwÿrjapê ca ha ate amji to ame apijapar xà itajê na me amji kôt hakop to mempeaj ne. Ne nee ca ha me apê cute me amji jahkre kêatre atajê pyrãc nare, ne quêt me akrã kreti te amji jahkre pejti kam me amji to ajpa.

¹⁶ Ne amcro atajêa kam, quê ha mehkên catêjê me hàhtô. Cwÿrjapê ca ha atÿj amcro cunea kam Pahpãm mã me apê, ne nee jÿ caxuw amcro nõ to me apictor nare.

¹⁷ Ne nee ca ha me apê cute me amji jahkre kêatre atajê pyrãc nare, ne quêt me pajõ Pahhiti mã ampo na me pahto prãm atajê to pit mã, ca hame gâpên to me apa na amji to me ahcukij.

Cu ha Pahpãm Carõ Pejti ata kôt me pajõ Pahhiti mã me cre

¹⁸ Ca ha côxÿhti to amji mã me ahimpej jicu, ne nee hipêr me to akôm quê me ato ipipãn nare. Ampo na mã wa me amã ihcawpa? He quê ha ihtÿj ate amji kam me gapac xà cunea kam ato kê. Na ca ha quêt Pahpãm Carõ Pejti to amji mã me ahimpej to me apa.

19 Ne ca ha me acakôac kam ajpën mã me Pahpãm na increr xà cunea to me acrer to me apa. Ne hanea ne mam Pahpãm te amji kam hapac xà na me ahna increr xà ata to me cumã cre. Ne cute ampo ton xà itajê na curmãme cumã increr xà ata to me cumã cre, ne me amã amji kïan kam me cumãcre, ne catihti pyrên me gakryti to me cumã cre.

20 Jezu Crixto kam me ahônco, cwÿrjapê ca ha ampo pej me, ampo te me ato jũ mãn xà atajê mea mã hÿrên me gakryti na, me pajõ InxũCati pê Pahpãm mã me amji jarê.

21 Ne pom ca amji mã Crixto cupa, ne amji caxuw me kampa ita cuxà, ca haatyj ajpën kam me gapac to me apa.

Pê Pawrô mehprõ catêjê japackre

Coroxo 3.18-19; 1 Petrô 3.1-7

22 Ne pyjê pê mepjê prõ itajê, pom ca amji mã me Pahpãm kampa ita na, ca ha amji caxuw me apjê kampa.

23 Ne ampo na mã wa ame amã ita to hahkre to hane? Nee mã ampo na nare. He Crixto pê mehwÿ krã pyrãac, ne mehwÿ pê hÿ pyrãac. Necupêa ri me to ihhimpej catê, ne cupê mehwÿ kên catia pê me hÿtâr catê. Jïkjê na mã, me apê mehprõ impjê catêjê, ca ha atÿj me aprõ to me ahimpej.

24 Cwÿrjapê ca ha me apê me apjê prõ catêjê, ampo cunea na amji caxuw me apjê kam me gapac to me hanea, pom quê Crixto na mehwÿ amji caxuw me kampa he.

*Pê Pawrô mempjê catêjê japackre
Coroxo 3.18-19; 1 Petrô 3.1-7*

²⁵ Mempjê catêjê, quê ha me amã me aprõ kîn hanea, pom quê Crixto mã mehkwy kîn, mã me hahpan xà na ihtyc he.

²⁶⁻²⁷ Ampo na pê Jeju me papê mehkwy mã ty? Nee mã pê ampo na ihtyc nare. He pê ihcunea na me papê mehkwy atajê kên pê me pahtoimpej partu to prãm to pê ty, mâr quê nee me pahkam ampo kên crire nõ hamreare ne. Ne me pamã me pahte amji kam pajapac xà to impej neihcuhhõ, mâr quê ihtetetti ne. Ampo na? He ramã me papê Jeju jĩ pyrãac. Ne harkwa ita pê ihhêj rûm cõ te ampo tûm cuhhõn pyrãc, netoa ri ihtýj me pahte amji kam me pajapac xà cuhhõ ne to impej. Ampo na? He cumã Hûm mã cute me pahto ipipê xà ata kam me pampejti kam, ampo kên tûm nare na me pahto prãm. He me papê hĩ pyrãac na ri.

²⁸ Ne me hûmre mã quê ha mehprõ kîn hanea, pom quê cumã amji jĩakîn he. Quê ha jûm mã ihprõ kîn ne to impej na, quê ha cumã ihkîn ita pê ihhêj rûm, amji jĩa kîn ne to impej.

²⁹⁻³⁰ He xà quê ha ajkĩ jûm mã amji jĩa kîn nare ne cumã amji curê? Quê! He ihtýj cumã harte, ne ma hamã. Ita na mã Jeju Crixto mepapê mehkwy to, ne me papê hĩ kam cukrã xà pyrãac.

³¹ Pê Pahpãm mam me panquêtjê mã harkwa ta ne me cumã:

“Quê ha me hûmre mehprõ,
ne me hûmjê me, menxyrxwý jicu,

ne hĩxime ajcaxê ne ajpên kam me pyxit peaj”
hane.

³² Ne pom Pahpãm te me pamã me pahprõ me, me pajikwa tuw xà to hũjarên xà ita, pê mam nee me hahkre pej nare. Ne ita caxuw cupê Crixto me, mehwya pyrãc, ne ajpên kam me pyxit peaj na, ramã pahte me hahkre pej.

³³ Ne hanea ne me pamã to hahkre to hane he. Quê ha me hũmre mã mehprõ kĩn hanea, pom quê me cumã amji jĩa kĩn he. Ne mehprõxwỳjê, quê ha ihtỳj amji mã mempjê cupahti to me ipa.

6

*Cu ha me pahpãmjê me, me panxrxwỳ kampa
Coroxo 3.20-21*

¹ Ne me apê mehkra xwỳjê, ca ha atỳj amji mã me apãmjê me, me axrxwỳ kampa, neamji mã me hũpahti to me apa, me pajõ Pahhiti jarkwa kôt. Hõ, quêt catyt kam me apa xà itajê te hajỳr he.

²⁻³ Ne pê Pahpãm mam ramã me panquêtjê kra mã harkwa ta, ne mecumã ahna hũjahkre to hane he:

“Ca ha atỳj amji mã, me apãmjê me, me axrxwỳ
kampa,
mãr ca apej pêa mã me apa,
ne amji to me apijapar to irya ne, pjê ita kam”
hane.

⁴ Ne me apê me hũmjê me inxrxwỳ xwỳjê, ca ha nee ame akra mã ame quêt nare, ne nee

ame cumã mencryc ton nare. Ne quêt me pajõ Pahhiti jarkwakôt me cumã aprĩa, ne catyt kam me cumã cute amji to me ipijapar xà to hahkre. Ne Pahpãm krã kreti te amji jahkre pejti te me hapackre xà atajê to, ca me hapackre.

Cu ha me pajõ pahhi catêjê kampa

Coroxo 3.22-4.1; 1 Timot 6.1-2; Tito 2.9-10; 1 Petrô 2.18-25

⁵ Ne cama me cumã me gâpên to me apa catêjê xwÿjê, ca ha atÿj amji caxuw me gõ pahhi kampa, ne amji mã me hũpahti to me apa to hanea, pom ca me amã amji kĩnti kam, amji caxuw me Crixto kampa ne me hũpa he. Hõhõ, cu ha me hane.

⁶⁻⁷ Ne nee cute me gâpên xà impejti na me garên prãmte ahêj, ne cama mento kam mare mã, me gâpên xà to mempejti to me apa nare. Nequêt me cumã me gâpên prãam kam me gâpên to me apa to hanea, pom ca Crixto pit mã me apê he. Ita na ca ha me hũmre mã me apê.

⁸ Ne me amã me gõ pahhi catêjê me, me gõ pahhi nare catêjê me, Pahpãm te ahpÿanre na ate me gâpên xà impej ton atajê jahpan xà na, me amã hãmjõr na, ca me to amji japackre.

⁹ Ne me apê hõ pahhi catêjê xwÿjê, ca ha me amã me hâpên catêjê to mempeaj ne, ne me hâpên xà na me cumã quêt jicu. Ne camacõjkwa kam me gõ Pahhiti mã ajwar me gâpên na, ca amji to me amji japackre. Ne me pahcunea pipên pit, ne cumã me pajâpên xà atajê kôt, quê ha me pahto ajpëan, ne catyt kam ahpÿanre na me pahcunea mãhãmjõr xà atajê to amgõ.

Pê Pahpãm Xatanaj me, me papijapu xà caxuw me pamã hàprê xà gõ

1 Texarõn 5.8-11; 1 Petrô 5.8-11

¹⁰ Ỹhỹ, Jeju kam apê me ikjêjê, wa ite me amã ihhóc jicu xà ita kam, wa ha ate mehkên me, me apijapu xà to me amã hahkre. He me papêihhêj rûm krãhtare kwỳ pijapu xà caxuw, cute apu amji mã hàhcuprõn pyrãac. Cwỳrjapê ca ha atỳj me pajõ Pahhiti carõt tỳjti kam me ahõnco, mãr quê taa me amã me acarõt to ihtỳj. Ne carõt tỳj ata kôt ca hame apijapu xà caxuw apu amji mã me ahcuprõ, mãr quê me pahcurê xwỳn pê me apytà.

¹¹⁻¹² Ne mër me pahcurê xwỳn jũjê me, cu ha me ajpu? He nee mã jũmjê nare, he ampo carõ kên pahtỳjti atajê me, me hõ pahhi pê Xatanaj me ri me papijapu xà. Ne nee mã mehĩ nare, me cupê ampo carõkên jõ pahhi catêjê pê cupê jarõti me, cu ha me ajpu. Ne pjê cunea kam ampo kên to mehhimpej, ne mehpahtỳjti, ne me hũpahti, ne ihcunea nacute me amji kam hapac xà kêanre. Ne mencwỳrjapêa ri ihhêj ne ramã pjê kam awcapàtkô, ne ihtỳj me cumã me papictor na me pahto prãm.

¹³ Cwỳrjapê ca ha me apê krãhtare kwỳ atajê te hàprê xà to amji tỳj, ne to me amji jamã pyrãac. Ne Pahpãm te hàprê xà to meapytàr xà caxuw, ca ha me apijapu xà te me apytàr xà cunea to me amji tỳj. Mãr quê meacurê xwỳn me akam tẽ, ca atỳj me apijapu kam tẽ, ne me ajpu, ne me tohjê, ne me to hamre. Jirô pê ca ha nee me hũpa te me gõ to meatẽm nare, ne atỳj

me acuhhê rohnÿtti mã.

Me papê krãhtare te hàprê xà to amji tÿj atajê pyràc

¹⁴⁻¹⁵ Por krãhtare hãn ne wakÿti te hitô krekà te hÿtâr xà to amji tÿj ata kôpit na, ca ha Pahpãm te me amã ate amji kam gapac xàpejti jôr ata kôt, ca ha catyt kam me apa. Ne ate amji kam me gapac xà imejti ata pê ri me apytâr xà. Ne por krãhtare hãn ne ihtu nahê xà tÿjti to ihtu na hê ata kôpit na, ca ha ate amji kam me gapac xà imejti, hêj xi nare to me apa. Ne por krãhtare hãn ne hõ parkàtÿjti mã amji jacjê, ne ma ramã me to imprar xàa caxuw to ihcuhhê ita kôpit na, ca ha jÿ kam atêm xà caxuw, ramã apu amji mã me gâhcuprõnhiahpuro. Mâr ca mehcunea mã, Jeju te hacpÿa mã Hÿm wÿr me to ipipkjêr mã me cumã ajpên kÿn na harê.

¹⁶ Ne por krãhtare hãn ne kruw pôc pÿr xà caxuw, wakÿti te hÿ tète hàmtâr xà to amji tÿj ata kôpit na, ca ha Jeju to amji mã meahimpej xà ata to me Xatanaj pê cupê jarôti jõ pahhi pê amji tète me amtà. Ampo na? He catyt kam me papa tète cute me pahhi kwÿn, cu ame pahpec, mã cute me pahkam ihtêm prãnte ri ihtÿj me pahcÿt to ipa.

¹⁷ Ne por krãhtare hãn ne ihkrã cahhêc cupate wakÿti te ihkrãhkà tÿjti to amji tÿj ata kôpit na, ca ha Xatanaj te akrã kam me amã ateme ampo kên ton to me apa to hahkre cupate, ca ha atÿj Pahpãm te ramã ampo kên itajê pê me pahpytâr na me to amji japackre. Ne por krãhtare hãn nehÿhkra to wapohiti xwahhihti cwa ata kôpit

na, ca ha amji mã me Pahpãm Carõ Pejti te me amã Pahpãm jarkwa jõr atajê juwahi to impeaj ne.

Cu ha pahtyj me awcanã, ne ma Pahpãm mã mehkwy cajrën

¹⁸ Ne ate ampo itajê cunea to me amji tỳj to me apa xà ita kam, ca ha Pahpãm mã me acakôc xà na, amji caxuw me Carõ Pejti na ahwỳ, mārquê me atehcajpa, ca cumã me acakôc. Ne nee ame apec ne ahna me amji jicu nare, ne atỳj me awcanã, ne ma Pahpãm mã mehkwy cajrën.

¹⁹ Ne hanea ne Pahpãm mã me icajrën to hane he:

— Me ijõ Inxũ Cati, ca ha Pawrô mã cute ampo jarën xà atajê to hahkre, quê me cumã hũjarën xà kam hãn ne nee amji na hàhtàt nare, mār quê mehcunea, hirãa pê, por pê mam nee ajco me Jeju jarën pejti kam hapac nare atajê kampa, ne me hahkre pej — hane.

²⁰ He wa me hacjên xà kam ikrĩ cacrô, cormã ipê Jeju jarkwa na iprar catê, na wa itỳj ita ri mehcunea mã Jeju pê me pahkritxwỳ jarën xà impejti to harê. Na ca ha atỳj ita na Pahpãm mã me icajrën, mār wa ite me cumã icakôc to jũ mãn xà ata kam, nee amji na ijàhtàt nare, ne catyt kam me cumã awjarê.

Pê Pawrô hìcu xà kam hipêr amji jarê

Coroxo 4.7-8

²¹⁻²² Ne wa ha ma me awỳr me pahtõ kĩnti pê Tiquicô pê Pahpãm mã hàpên catê impejti ata kujate, ijõ kàhhôc ita to. Quê ha curicato ne taa me amã ihcunea na ijarën pa. Ne cute me amã

ijarēn xà ita caxuw wa ite me awȳr ijō kàhhôc ita to ihkujahêc, mār ca me ijarēnpa, ne me amã amji kīn, ne me gakry.

²³ Ne wa ijōtpê Pahpām mã me acajrēn to hane he:

— Ÿhỹ me ijō Inxū Cati pê Pahpām me, me ijō Pahhiti pê Jeju Cixtô, ca ha ampo kên jipôc ri me ikjêjê ame ipa atajê mã mehcarĩcti to, mārquê nee ame amji mã ampo cupa nare. Ne hanea ne me cumã ajpên kīnti to, quê me ajpên kīn to me ipa. Ne hanea ne cute amji mã me atoihhimpej xà na me to, quê amji mã me ato ihhimpej.

²⁴ Ne hanea ne hōtpê me cumã me ijō Pahhiti pê Jeju Cixtô kīn rohnýtti mã atajê mã, ampo pej cunea to — hane. Hamre, ita pit.

PAHPÃM JARKWA CUPAHTI JÕ KÀHHÔC
Canela: PAHPÃM JARKWA CUPAHTI JÕ KÀHHÔC
(Portions)

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 1 Oct 2024 from source files
dated 29 Jan 2022

09d4e460-c38b-52b7-81c1-8300bfeb466a